



# PARTII INUIT INATSISARTUNI

**Partii Inuit**

**UKA 2013/35-1**

**Randi Broberg**

**15.10.2013**

Una pillugu siunnersuut: **Kalaallit Nunaanni pinerluuteqarsimasut singernermikkut nalunaarsuuteqarlutik angerlarsimaffimmi pineqaatissinneqarsinnaalernissaat anguniarlugu, Naalakkersuisut Jusitsministerimut attaveqaqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortat Doris Jakobsen aamma Kristian Jeremiassen, Siumut)

Siunnersummut tunngatillugu, Partii Inuit siunnersummut tunngaviusumik isumaqataavoq. Tassungali atasumik aamma isumaqarluta, sukumiinerusumik qulaajaaneq Kalaallit Nunaanni ingerlateqqaerneqartariaqartoq – Danmark’imi Inatsiseqarnermut Naalakkersuisumut saaffiginninneq pitinnagu. Tassani pissusissamisoorpoq, Danmark’imut saaffiginnissuteqarneq sioqqullugu, saaffiginnissutip imarisassaa suunersoq paasereersimassallutigu.

Nunarput isorartoqaaq, taamalu sumiiffinni atukkat periarfissallu annertuumik assigiinngiaarsinnaallutik.

Taamalu pineqaatissinneqarsimasunik isumaginnittut imal. susassaqarfiiit allat suliaqarnerminni pineqaatissinneqarsimasunik kalluaasartut sapinngisamik tamarmiusut, qanoq sutigullu suleqataasinnaanerat minnerpaamik ilisimasariaqarparput.

Pinerluuteqarsimasunik Isumassuiffik, pinerluttaalisitsisut aammalu Kalaallit Nunaanni Eqqartuussiveqarnermut Siunnersuisoqatigiit qitiupput.

Taakkuli saniatigut aamma nalunngilarput inuiaqatigiittut allanngoriartorneq pisoq; ilaatigut pinerluuteqartartut inuusussiartorlutik, taamalu aamma Inunniq Isumaginniffiit, inuusuttunut ulloq unnuarlu angerlarsimaffiit akuunerat annertusiartuinnarluni.

Partii Inuit pissusissamisoortipparput, aammattaaq inunniq isumaginninnermut tunngasunik suliallit uani iliuusissarsiorluni qulaajaanermi akuutinneqarnissaat.

Minnerunngitsumillu pinerluttaalisitsineq tunngavigalugu suliniarnermut akkiullugu, singernikkut nalunaarsuuteqartitsisarnerup qulaajaavagineqarnissaat pissusissamisoortillutigu.

Kiisalu naggataarutaasumik Naalakkersuisut innersuussutigisaattut siunnersuutip itigartitsissutigineqarnissaat isumaqatigaarput, tassungalu atasumik allanguutissatut siunnersuutigineqartoq isumaqatigalutigu; tassa susassaqartut akuutillugit sukumiinerusumik qulaajaasoqaqqaassasoq.

Qulaajaaneq pereerpat, siunnersuutip uuma qaqqinnejarnissaat Partii Inuit soqtigalugu utaqqimaassavarput.